



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :

Tir Yimiyim

tiryimiyim@aolima

tir yimiyim

TAPAK 8

Onoki J&K nem state jenjang agütsütsü akhanger: Rahul

Haiti Tir Moise tepsetba bushisüngdangtsü obendanger ka shim

VOL. XVIII NO. 298 (ADOK 298)

DIMAPUR

RASEMNÜ (WEDNESDAY)

LUROI (AUGUST) 11, 2021

₹ 5.00

## Nagaland nung DDO 42-i pay & allowances tiyazü yanglur Rs 4.51 crore agizük Sorkari teinyaktsü meinyakba ajanga tiyazü nung sen achiba manener

**Kohima, August 10, 2021 (TYO):** Nagaland nung Rs 4.51 crore tashi itasen aser allowances talila aser tiyazü yanglua agiogo ta Comptroller Auditor General of India (CAG)-i metetdaksü.

Tesüiba Audit Reports nunga DDO temi pay & allowances bills tiyazü yanglur sen agizükba metetdaksüogo saka sorkari teinyaktsü meinyakba ajanga DDOs aser Treasury Officers-i sorkar sen tim mesüi agizüka agir, ta CAG-i ashi.

Sorkar department 20 nungi DDOs 42-i sen talila yanglur agi.

Department pezü nungi DDO 4-i pay bills 49 nung shitakba agibo Rs 135.57 lakh dang agizüksüba sernung Rs 153.25 lakh agizüka liasü. December 2011 nungi August 2017 tashi iba ajanga Rs 17.68 lakh talila agizük, ta CAG-i ashi.

Iba tim masüba inyakim tutetba sülen Superintendent of Excise & Prohibition, Dimapur-i Rs 4.55 lakh talila agizükba nungi Rs 40,000 meyipa nguogo. Ajisüaka, July 2020 tashi nung tanünga DDO asem- District Employment Officer Tuensang (Rs 1.59 lakh), General Manager of District Industries Centre Tuensang (Rs 4.55 lakh) aser District Sports Officer Zunheboto (Rs 9.31 lakh) nungi telangzüba kecha mali.

Ano, Department pezü nungi DDO 9-i January 2016 nungi February 2018 tashi bill 26 nung Rs 100.61 lakh agizüka liasü. Iba ya pay & allowances aser arrear bills atema liasü saka taoba regular bills nung agizükadoker liasü. Parnoki sen tim mesüi agizük saka July 2020 tashi nung DDO kati danga telangzüba magütsü, ta CAG-isa metetdaksü.

Sub-Divisional Education Officer, Changtongya aser District Education Officer, Mokochung-i June 2017 ita atema mapa inyaker 19 indang pay & allowances Rs 36 lakh talila agizüka liasü. Parnokisa January nungi May 2017 tashi atema DA arrears Rs 67,000 agizük saka ibaji DEO, Mokochung-i agizükadoker liasü. Ano, October, November & December 2017 atema parnoki mapa inyaker 19 indang pay & allowances Rs 27.27 lakh agizük saka ibaji SDEO, Changtongya aser DEO, Mokochung ajanga agizükadoker liasü, ta CAG-i metetdaksüogo.

Sub-Divisional Education Officer, Tuensang-i February 2017 atema tesayur 76 indang pay & allowances anaben agizük aser ibaji Rs 27.97 lakh liasü.

Sub-Divisional Education Officer, Mokochung-ia July 2017 atema tesayur 12 indang pay & allowances anaben agizük aser ibaji Rs 7.45 lakh liasü.

Sub-Divisional Education Officer, Mangkolemba aser District Education Officer, Mokochung-i July 2017 atema tesayur 14 indang pay & allowances anaben agizük aser ibaji Rs 15.31 lakh liasü saka SDEO Mangkolemba aser DEO Mokochung-i agizükadoker liasü. November 2017 nunga kasaji parnoki mapa inyaker 13 indang pay & allowances anaben agizük.

General Manager, District Industries Centre, Dimapur-i January nungi December 2016 tashi mapa inyaker 26 indang DA arrears anaben agizük aser ibaji Rs 2.07 lakh liasü.

General Manager, District Industries Centre, Peren-ia August & September 2017 itatem atema mapa inyaker 5 indang pay & allowances anaben agizük aser ibaji Rs 2.32 lakh liasü.

Functional Manager, Sub-District Industries Centre, Meluri-i January nungi November 2017 tashi atema mapa inyaker 7 indang DA arrears anaben agizük aser ibaji Rs 1.37 lakh liasü.

District Sports Officer, Zunheboto-i December 2016, January 2018 aser February 2018 itatem atema mapa inyaker 11 indang pay & allowances anaben tashi agizük aser ibaji Rs 6.38 lakh liasü.

District Public Relation Officer (DPRO), Phek-i January nungi November 2017 tashi mapa inyaker 41 indang DA arrears anaben tashi agizük aser ibaji Rs 1.74 lakh liasü.

Department 6 nungi DDO 9-i bill 78 nung mapa inyaker indang basic pay talila kümütsür Rs 48.72 crore agizük saka shitakbo Rs 46.80 crore dang agizüksüba liasü. Iba ajanga parnoki January 2016 aser February 2018 tashi nung Rs 1.92 crore talila agizüka agi, ta CAG-isa metetdaksü.

August 2019 nung Mechanical Engineer, PWD, Mechanical Division, Tuensang-i ashiba agi Division aser Sub-Division Office building yangluba nung sen amshi saka iba ya tim masüba inyakim ka lir aser magizük, ta CAG-isa ashi.

Executive Engineer, PWD (R&B), Atoizu atema sorkari telangzüba agütsüba nung mapa inyaker indang basic pay aibelen yangluba ajanga Rs 13.84 lakh talila agizük aser ibaji meyipa

agütsütsü ta ashi.

Ajisüaka, July 2020 tashi nung tanünga DDO tenet nungibo telangzüba kecha maliasü.

**Telangzüba magütsüba DDOs:**

# Sub-Divisional Education Officer, Dimapur-i January nungi June 2016 tashi tesayur 165 indang basic pay talila kümütsü aser tesayur pezü indang DA arrear DEO, Dimapur-i agizük liasü sernung ano anaben tashi agizük dang Rs 3.68 lakh talila agizük.

# Sub-Divisional Education Officer, Chozuba-i January nungi April 2017 tashi tesayur 40 indang basic pay talila kümütsür DA arrear Rs 3.35 lakh talila agizük.

# Commandant, 8th NAP Battalion, Naltoa, Zunheboto-i March 2017 nungi February 2018 tashi police indang basic pay talila kümütsür Rs 1.16 crore talila agizük.

# Superintendent of Police (NPTO), Mokochung-i February 2017 nung police 22 indang basic pay talila kümütsür Rs 2.04 lakh talila agizük.

# Commandant, 3rd NAP Battalion, Tuensang-i March nungi November 2017 tashi police indang basic pay talila kümütsür Rs 37.62 lakh talila agizük.

# Principal, Women Industrial Training Institute, Dimapur-i February 2018 nung mapa inyaker 21 indang basic pay talila kümütsür Rs 2.79 lakh talila agizük.

# District Cultural Officer, Tuensang-i August 2016 nung basic pay ajungketer Rs 3.04 lakh talila agizük.

Department 16 nungi DDO 20-i November 2016 nungi March 2018 tashi arrear bills 88 nung Rs 140.84 lakh tim mesüi agizük, ta CAG-isa metetdaksü.

Iba nungi Rs 17.33 lakh meyipa nguogo saka Rs 123.51 lakh ano mangu lir, ta parnokisa ashi.

District Transport Officer Mon-i Rs 2.27 lakh meyipa angu aser SP District Jail Mon, Sub-Treasury Officer Changtongya aser Senior Treasury Officer Wokha nungertemi Rs 15.06 lakh nguteta sorkar senpong nung enoktsüogo. Rs 15.54 lakh agizük baji pa jakdang inyaker temi liasü aser iba atema anaben tashi osang sangoktsü saka telangzüba kecha mali ta Senior Treasury Officer, Wokha-i telangzüba agütsü.

Taoba cashier-i DDO nem memetdaksü itasen aser tanga allowances agizük aser akok ta District Cultural Officer, Tuensang-i ashi saka iba ya DDO indang teblemetsü khuret lir, ta CAG-isa ashi.

Külen, District Public Relation Officer, Mon-ia ashiba agi December 2011 nungi December 2016 tashi mapa inyaker ka indang pay arrear ajema angu.

Ajisüaka, DDO-i agütsüba service book repringdang idakji aliba basic pay den arrear bill agizükba indang meputep liasü anungji sen talila agiba meyipa angutsüla, ta CAG-isa metetdaksü.

Agronomist, State Seed Farm, Merapani, Wokha-i tzünglu kanga aruba ajanga takoksa anguba nung amshitsü atema sen agizük ta ashi saka ibaji sen tim mesüi amshiba lir, ta CAG-isa metetdaksüogo.

**July 2020 tashi nung tanünga DDO 13 nungibo telangzüba kecha mali. Parnokji:**

# Sub-Divisional Education Officer, Wokha-i January nungi June 2017 tashi mapa inyaker 63 indang DA arrears Rs 2.27 lakh talila agizükba.

# District Soil Conservation Officer, Wokha-i December 2017 nungi March 2018 tashi mapa inyaker 83 nem pay arrears ajema agütsü ta shir Rs 12.59 lakh talila agizükba liasü.

# District Employment Officer, Mon-i December 2015 nungi August 2017 tashi mapa inyaker 3 indang pay arrears ajema agütsü ta shir tiyazü nung Rs 17.09 lakh agizük.

# General Manager, District Industries Centre, Zunheboto-i July nungi November 2017 tashi mapa inyaker 11 indang pay arrears ta tiyazü shir Rs 9.33 lakh agizük.

# Functional Manager, Sub-District Industries Centre, Aghunato-i October & November 2017 tashi mapa inyaker 7 aser ano December 2017 ita atema mapa inyaker ka indang pay arrear ta tiyazü shir Rs 3.63 lakh agizük.

# District Cultural Officer, Tuensang-i ita asem asoshi mapa inyaker 2 indang itasen tik mesüi Rs 4.28 lakh agizük saka tenati itasen shitak dang agizüka aru.

# Superintendent of Taxes, Mon-i December 2015 nungi December 2017 tashi mapa inyaker 5 indang pay arrears ta

tiyazü shir Rs 3.43 lakh agizük. # Registrar of Co-operative Societies, Nagaland, Kohima-i junior/senior inspectors 32 indang increment arrears ta shir tiyazü nung Rs 15.73 lakh agizük.

# Superintendent of Excise & Prohibition, Mokochung-i August nungi November 2017 tashi mapa inyaker 8 indang pay arrears ta tiyazü shir Rs 11.76 lakh agizük.

# District Public Relation Officer, Mon-i December 2011 nungi December 2016 tashi mapa inyaker ka indang itasen ta shir tiyazü nung Rs 2.29 lakh agizük.

# District Public Relation Officer (DPRO), Phek-i December 2011 nungi December 2017 tashi mapa inyaker 8 indang arrears ta tiyazü shir Rs 5.78 lakh agizük.

# Superintending Engineer, Mokochung Electrical Circle-i October 2013 nungi November 2017 tashi mapa inyaker ana indang itasen aser arrears ta tiyazü shir Rs 1.91 lakh agizük.

# Executive Engineer, PHED, Urban Division, Kohima-i January 2015 nungi October 2016 tashi mapa inyaker 63 indang pay arrears ta tiyazü shir Rs 11.99 lakh agizük. Iba nungi nisung 10 indang tenüngbo monthly pay bills nung maliasü aser ibaji 'bogus names' ta kuli agütsür.

# District Horticulture Officer, Mon-i March 2016 nungi March 2017 tashi mapa inyaker 7 indang pay arrears ta tiyazü shir Rs 1.62 lakh agizük.

# Agronomist, State Seed Farm, Merapani, Wokha-i January nungi August 2017 tashi mapa inyaker 11 indang pay arrears ta tiyazü shir Rs 1.45 lakh agizük.

# Sub-Divisional Agriculture Officer, Aboi-i March 2013 nungi November 2014 tashi mapa inyaker 12 indang pay arrears ta tiyazü shir Rs 1.79 lakh agizük.

Tesüiba Audit Reports nunga Nagaland nung DDO temi tiyazü nung pay & allowances bills yanglur sen agizükba metetdaksüogo. Iba ya kanga dang süoki ia bilemetsüba inyakim ka lir saka sorkari teinyaktsü tim meinyakba ajanga DDOs aser Treasury Officers ajanga sorkar sen tim mesüi agizüka agir, ta CAG-isa metetdaksüogo.

## COVID-19 Nagaland: 102 dak putet, 117 taneptsü angu

**Kohima, August 10, 2021 (TYO):** Mongulbarnü Nagaland nung nisung 102 dak COVID-19 putet aser 117 taneptsü angu.

"Tanü COVID-19 puteta alir nisung 117 tashi taneptsü nguogo. Parnokji Dimapur nung 57, Kohima nung 35, Mokochung nung 11, Phek nung 9, Tuensang nung 3 aser Mon nung 2 lir. Parnok züngsema

taneptsü angur 26,023 kümogo" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Mongulbarnü nisung 102 dak COVID-19 aliba putet. Parnokji Kohima nung 40, Dimapur nung 27, Mokochung nung 15, Tuensang nung 6, Wokha nung 5, Longleng nung 4, Zunheboto

nung 3 aser Peren o Phek nung kaka (1) lir" ta paisa ashi.

Nagaland nung COVID-19 nungi taneptsü angur 90.32% lir aser tang nisung 1,374 anepaludar, ta Dr Kikon-isa ashi.

Tang tashi nung COVID-19 alitsü akok ta temolung melemi bilemba sample 280,777 tendangogo. RT-PCR ajanga 104,399, TrueNat ajanga 70,332

asir Rapid Antigen Test ajanga 106,046 tendang, ta Dr Kikon-isa shisem.

"Hombat tashi nung nisung 632,435 nem COVID-19 vaccine indang dose 792,872 agütsüogo" ta State Immunization Officer, Dr Ritu Thurr-ia ashi.

"Vaccine agirtemji frontline workers 60,833, healthcare workers 15,985, arishi küm 45 ser

temapur 188,296 aser arishi küm 18 nungi 44 tsüngda alir 367,321 lir" ta paisa ashi.

"Vaccine agirtem rongnung nisung 160,437-i dose anaprong agiogo. Parnokji frontline workers 41,318, healthcare workers 12,634, arishi küm 45 ser temapur 104,956 aser arishi küm 18 nungi 44 tsüngda alir 1,529 lir" ta Dr Thurr-isa metetdaksü.

# NSRLM Dimapur ajanga Morpho oset lemstsü



Deputy Commissioner, Dimapur indang Conference Hall nung August 10, 2021 nü tesemdanger tongti, ADC Dimapur den NSRLM aser CSC Dimapur nungi ketdangsürtem aser tajangzük angurtem külemi tangokba noksa ka yangi angur.

**Dimapur, Luroi/August 10 (TYO):** India nung nungur küm 75 ajungba benjongmung, "Azad Ki Amrit Mahotsav" nungtem nung Nagaland State Rural Livelihood Mission (NSRLM) Rural Development Department, Dimapur ajanga Common Service Center (CSC) den lungjemer Digipay Sakhi nem Morpho Device lemstsüba aser training sentong ka August 10, 2021 nü Deputy Commissioner, Dimapur indang Conference Hall nung ayongzüküka liasü.

Iba sentong nung tesemdanger tongti ka ama jembiba mapang, ADC Dimapur, Atokhe Aye, NCS ajanga teyari angurtem dang department tenung nung meranga inyaka takok angutsü ajungshi aser department-i parnok dak tamang katetba ajanga parnok ya shimtetba lir, ta shia liasü.

Dimapur nung aliba SHG temi kanga nendaka aser meranga inyaker, aser yamaji bank balalai parnok maneni yarir, aser ano rongsenketzung

tsütsü parnok maneni temaba jenjangi ajungkettsü asoshi shilem agia yaritsü mepishir, ta Atokhe-i ashi.

India nung nungur küm 75 ajungba benjongmung nungtem nung pai nisung/telok 13 nem Morpho device amokja liasü.

Project Director, DRDA Dimapur, Kethosituo Sekhose-i sentong nung o tatsüka jembiba mapang, tajangzük angurtem dang senotsü tsütatep metenzükdang iba oset amshiba nung mongin akumtsü ajungshia liasü.

Paisa tajangzük angurtem dang nungi shisatsü meshia liasü, aji asünung dang department ajanga nüburttem ajangzüktsü asoshi akok tashi yaritsü, ta pai ashi.

Sekhose-isa bank tem dang tarutsü anogotem nunga SHG tem den maneni yariteptsü ayongzüküka liasü.

Paisa Direct Bank Transfer amshiba department tem danga Digi Pay amshitsü asoshi lenmang bushitsü ayongzük, koba Nagaland nung benoka lir. Nüburttem makamait jenjang

nungi ajungketa terenlok balala ajanga lokti aser rongsenketzung temaba jenjangi ajungkettsü nukjidong aliba ama NSRLM ajanga inyakba asoshi DPRO Dimapur, Lolano Patton-i tenüngsang agüja liasü.

Digi Pay atema Morpho device amshiba yagi senotsü tsütsü service tajungba agütsüba kisüing masü saka mapang kumzüktsü, timtem malitsü aser ochishia inyaktüsü, ta lai ashi.

SPM-FI SMMU NSRLM, Rajusalie Lhousu ajanga Digipay Sakhi indang rasaa ashi aser CSC, District Manager, Dimapur, Along ajanga iba oset amshitsü indang yimyatem sayua liasü.

Iba sentong nung bank balala nungi ketdangsürtemia jembiba aser parnoki SHG pur akok tashi yaritsü, ta shia liasü.

Sentong nung ADPM, DMMU, NSRLM, M. Yimok Phom ajanga tarur pela agizükba o jembiba aser DC- FI, DMMU, NSRLM, Y. Agnes Ezung ajanga tepela ankep o jembiba liasü. Iba sentong nung AC- BMMU Kuhuboto, NSRLM, Zgevi Achumi menden liasü.

# Van Dhan Vikas Yojana nung Nagaland-i sempet 7 angu

**Kohima, Luroi/August 10 (TYO):** Van Dhan Vikas Yojana aser Minimum Support Price (MSP) scheme indang telemsa balala nung tatishitsü keta inyaktetba atema Nagaland-i National award tenet tashi nguteta liasü.

Telemsa asem, Best Survey, Best Training aser Van Dhan Vikas Clusters (VDVKCs) timtiba amenokba nung Nagaland temaba jenjang nung liasü, ta Additional Director, DUDA, Dr. Anungla Imdong Phom-i sangdong ka nung ashi.

Best Sales Generated nunga sen 115,86,000 yokzüküka state ya tasembuba jenjang ngutet aser Innovation and Creativity nunga tasembuba jenjang nguteta liasü.

Ano Nagaland nungi Toka Multipurpose Society Ltd ajanga

Gooseberry wine yangluba nung Best Innovative & Creative Product aser NBHM ajanga Mushroom Cultivation indang nunga sempet ngua liasü, ta lai ashi.

Item sempet ya Union Minister for Tribal Affairs, Arjun Munda ajanga TRIFED indang 34 buba Foundation Day, August 6, 2021 nü TRIFED Headquarters, New Delhi nung amungdang virtual yimya nung sangdonga liasü.

VDVY Scheme kübok Nagaland nung cluster 206 lir aser yangji SHGs 2,805 aser state tesem ajungalen tajangzük angur nisung 61,800 lir, ta lai ashi.

Iba scheme ya Tribal Cooperative Marketing Development Federation of India (TRIFED), Ministry of

Tribal Affairs (MoTA) kübok Department of Underdeveloped Areas (DUDA), Marketing & Consumers' Federation Ltd (MARCOFED), Nagaland Beekeeping & Honey Mission (NBHM) ajanga inyaker aser Department of Environment, Forest, Climate Change ya State Nodal Department lir, ta Dr Phom-i ashi.

VDVK aser MSP for Minor Forest Produce (MFP) scheme yagi aluyimer indang entrepreneurship sentongtem nung processing, packaging, branding aser marketing nung rangloker yarir, ta lai ashi.

Department balalai tangatetep nung inyakba aser nüburttemi yariba ajanga Nagaland-i item sempet ya ngutet, ta Dr Phom-isa ashi.

# Ayongtem anasa mekazütsü metetdaksür

**Dimapur, August 10, 2021 (TYO):** Tzungluruwa mongpu atongba ajanga Dimapur District nung aliba ayongtem nung tzü talila ayimer aser tzümetsüing lendong ataloktsü akok anungji nisungtemi ayongleni maotsü

metetdaksüogo.

Iba osang ya Dimapur Deputy Commissioner aser District Disaster Management Authority (DDMA) Chairman Rajesh Soundararajan, IAS-i ashi.

Iba dak sendakba nung ayong

anasa aliba yimtsüingtem aser village council temi tzungluruwa matem tashi ayongküm aser ayong anasa ango apuba, picnic mesüra tanga sentongtem noktangtsü metetdaksür, ta Rajesh Soundararajan-isa ashi.

# Tetsür ka pua ayuba ken o nung nisung pezü apu

**Dimapur, Luroi/August 10 (TYO):** Tetsür ka pua bener oa ozüing alema pua ayuba maparen dak sendakba nung Dimapur Police ajanga nisung pezü - arishi küm 35 tain Semato Shohe, "Leacy" NSCN-IM; arishi küm 36 tain Ahuka Yeptho, "Secretary" NSCN-IM; arishi küm 42 tain Sunjemtoshi Aier aser arishi küm 46 tain Supong Ao - pua liasü, ta sangdong ka ajanga ashi.

Tetsür la yagi mejangjaba nisung pezüü anogo pezü tashi la mejangjaba tesem ka nung ozüing alema pua ayu, ta ashishitep ken o ka benokba sülen par pezü ya anogo balala nung pua liasü.

Bushisüngdangba mapang sen aputsüba society ka nem sen lakh ishika apua aliba memonoktetba mechi tetsür la ya apu, ta temai adok. Iba dak sendakba nung ken o ka East Police Station, Dimapur nung züluokogo.

Ozüing alema country-made .32 pistol ka bena aliba mechi Dimapur Police-i August 9, 2021 nü arishi küm 37 tain NSCN-IM indang Razoupeyu, Muga Khulu apu. Police temi iba nisungba ya ISBT area, Purana Bazaar, Dimapur nungi pua liasü.

Iba dak sendakba nung ken o ka East Police Station, Dimapur nung züluokogo, ta sangdong ajanga ashi.

# Longleng district jail meyangluba atema PIL ka benoker

**Kohima, August 10, 2021 (TYO):** Tanü tashi Longleng nung District Jail maliba atema Guahati High Court Kohima Bench nung Public Interest Litigation (PIL) ka benokogo. Nagaland State Legal Services Authority (NSLSA) Panel Lawyer teyari agia iba PIL benok. "Longleng nung District Jail yanglutsü atema 2006 küm work orders agütsü anungji iba mapa inyakertem dang mapa tembangtsü inyaktüsü tetuyuba agüjang" ta PIL nung shia lir.

PIL nungsa iba dak sendakba nung senotsü tim mesüi amshiba bushisüngdangtsü ateam enquiry committee ka tentettsü shia lir.

February 2, 2006 nungi state sorkari nija telok ana nem Longleng District Jail yanglutsü atema work orders aiben agütsüogo aser parnoki mapa inyaktüsü atema crore aika agizükogo. Ajisüaka, tanü tashi

District Jail yangluba mapa merenem aser iba ajanga tepuokdak ayurtem nem temeten magütsür, ta PIL nungsa shia lir.

Nagaland nung district jail malibaji Longleng District dang lir aser iba jagi Under Trail Prisoners (UTPs) aser tangartem Mokochung District Jail nung ang ayur aser district headquarters tsüingda senzütsü atema ghonda 2 nungi 3 tashi agir.

February 2, 2006 nü sorkar mezüingbuba work order agütsü aser iba sülen tang tashi nung work order 20 tema agütsüogo.

Iba PIL ya August 4, 2021 nü Justice Songkhupchung Serto aser Justice S. Hukato Swu na adenba division bench-i angadangogo aser ano hopta 5 lir angadangtsü lemteta lir.

Iba mapang State sorkar dena mapa inyakertemi telangzüba agütsütsü metetdaksüogo.

# CNTC ajanga NCD tir aser tatong tir tasenba temolung süa agizük

**Dimapur, Luroi/August 10 (TYO):** Naga Council Dimapur (NCD) nung 2020-2025 kümsük nung inyaktüsü shimtetba tir tasenba, Etsungmomo Kikon aser Vice President (Admin) Holuto Aye na nem Central Nagaland Tribes Council (CNTC) ajanga tenüngsang agütsü aser tena lenisüba kübok NCD den yariteptsü ashi.

NCD asoshi Ao Senso

Telongjem Dimapur (ASTD) ajanga nungita yaritepba aser amalitep akaba aser kin balala tsüingta mangatetep adoka aliba tim lenmang nung angatetepdaksüba atema CNTC ajanga tenüngsang agütsü.

Lenir tasen kübok Dimapur nung aliba nüburttemi ajanga ajangzüktsü asoshi NCD-i bendanga agütsür nendaka inyaktüsü imla atar, ta CNTC ajanga ashi.

# Chümoukedima Village Council ajanga sangdonger

**Dimapur, Luroi/August 10 (TYO):** Chümoukedima yimtsüing tejenba wazüka ayutsü mechi iba telungzük nung süngtong-litong aser arem shiruru samatsüsa shikariba aser danga inyaksangshi ajunga nokdangtsü asoshi ozüing yanglua lir, aser 'old Chümoukedima heritage village' semdangertemi anidaksü aser inyaktüsü asoshi ano maneni Chümoukedima Village Council (CVC) ajanga nenshia totuyuba kar agütsüogo.

1. Tetsüing agi tesem balala repranga nemzü-nembonga senzürtemi iba tesem ya bulua semdang, koba tajung lir, saka tesem balala reprangdak (viewpoint) shisaa maoba jana tali akumba ya tebilemstü tulu lir, anungji CVC ajanga iba 'heritage village' semdangertemi anidaksü aser inyaktüsü asoshi ano maneni Chümoukedima Village Council (CVC) ajanga nenshia totuyuba kar agütsüogo.
2. Monument aser nüburttemi

amshiba ki-o-jen meraksatsü aser memenentsütsü ajungshir, kechiaser temolung ayangtsüka arogoi azünga aliba nungshilong kar raksatsü; yi bottle tazüingla aser danga osettsüset tem prokshiba ajanga heritage site nung chia-jema tim masüba mapa inyakba sayur, koba Chümoukedima nüburttemi mezüingmeshiba lir, aser iba amala mapa inyakba atema tatok magütsütsü. Iba ama mapa tamajung inyakba ya khukhua aitsür, aser tang nungi tenzüka iba ama mapa inyakba putetra, ozüing nung aliba ama tapet temerenshi agütsütsü aser senchi achitsü.

3. Yimtsüing tejenba nung shikariba, kiset shiruru nem chiyongtsü bendentsüba, tatsüktsü süng akoba, süngkum aser danga arem nungi adokba rongsentem nokdanga aliba ozüing sülen nüburttemi ajaki shidak anidaksüla, aser aibelener nem pei aibelen yari senchi sen lakh ka tashi achitsü, ta metetdaksü.

### Shillong nung IED apokdang tetsür ka yiru; HNLC-i tenüing agir



Laitumkhras Market nung IED apokdak tesem nung nisungtem nungdena aliba noksa nung angur. (Shillong, Aug. 10, 2021)

**Guwahati, August 10, 2021 (Agencies):** Mongulbarnü Shillong nung aliba Laitumkhras Market nung IED apokdang tetsür ka dena nisung ana yiru. Tanü nikongdang 1:30 ako meta Laitumkhras market nung süngo ayokba dokan ka anasa bomb apok ta police-i ashi. Bomb apokba anasa tetsür dokan kibur ka yiru aser la Nazareth Hospital-i anir ao. "Bomb apokba sülen bomb squad, Crime Scene Unit aser

Dog Squad pur tesem tonga ao. Bushitepa arudang IED apokba bushitet" ta East Khasi Hills SP Sylvester Nongtnger-i ashi. Iba lendong nung nisung ana terara yiru aser süngo ayokba dokan jara den iba anasa aliba ki nung windows glasses raksa, ta paisa ashi. Iba tatalokba atema Laitumkhras Police Station nung FIR ka benokogo ta SP Sylvester Nongtnger-isa metetdaksü.

Meghalaya nung telungpur telok Hynniewtrep National Liberation Council (HNLC)-i iba tatalokba atema tenüing agiogo. "Laitumkhras nung IED pokdaksüba khukhua aitsür. Home Minister, Lakhmen Rymbui aser Meghalaya Police ketdangsürtemi kü dang iba osang shiogo aser bushisingdang südar" ta Meghalaya Chief Minister Conrad Sangma-ia metetdaksüogo.

### Assam nung süngolu nung inyakertemi 'tea department' meshir

**Guwahati, August 10, 2021 (Agencies):** Assam nung süngolu mapa inyakertem indang trade union tulutiba Assam Chah Mazdoor Sangha (ACMS)-i tea department ka meshir. Assam nung tea department ka lapokba ajanga tea industry shia arutsü, ta parnoki ashir. "Assam nung tea ministry ka lapoksubaji kanga dang tim kechiyong Assam nung tea industry ya 195 tema lir aser

iba ajanga nisung million aika yarir" ta ACMS president aser taoba union DoNER minister Paban Singh Ghatowar-i ashi. Hombarnü Dibrugarh nung ACMS indang 63 buba foundation day amongdang pai iba osang metetdaksü. "Alima ajungalen Assam indang süngu tetshir. State rongsenketzüng atema süngo ajanga sen aika bentsür arur aser tea industry nung nisung million aika shilem agir. Assam

nung fisheries atema ministry lir anungji süngo atema ministry alitsüla" ta Ghatowar-i ashi. "Assam nung tea ministry ya akhidang nungi lapoker alitsüba liasü. Iba ya employment generator industry tulutiba aser nisung lakh aika nem mapa agütsür" ta paisa ashi. Assam nung süngolu tulu 800 aser tila meyirjang aika lir aser India nung süngo 51% tashi adoker.

### Moreh nung prangpong-injang aika ngutetogo



**Imphal, August 10, 2021 (Agencies):** Manipur kübok India-Myanmar arrtsü anasa aliba Moreh nung prangpong-injang aika ngutetogo. "IGAR South kübok Moreh Battalion aser Manipur Police yaritepa S Moljol yim nung mita aodang prangpong-injang aika ngutet" ta AR sangdong ka nung metetdaksü. "Osang tejangja angazükba nung ajemdaker onoki mita

aodang M-16 rifle ana, AK-56 rifles ana, 9mm pistols ana, Chinese hand grenade ka, 7.62 mm rounds 361, 5.56 mm rounds 31, 9mm rounds 23, .38mm rounds pezü, assault rifles magazines 9, pistols magazines 3 ngutet" ta parnokisa ashi. Parnoki apuba prangpong-injang ajaki Moreh Police ket nung agütsüogo. Manipur sorkari police aser

paramilitary forces dang Independence Day matongdang maparen akangshia inyaksü tetuyuba agütsüogo. Independence Day amongtsü jakdang Manipur nung lendong ataloktsüba tesemtem nung security akangshio. Assam Rifles, Manipur Rifles aser tanga security agencies-i state police den yaritepa inyaker.

### Tripura TMC züngsemtem amakba manenra Bengal BJP züngsemtemi timtem ajurutsü

**Guwahati, August 10, 2021 (Agencies):** Tripura TMC züngsemtem amakba manenra West Bengal nung BJP züngsemtemi iba khuret abentsü ta West Bengal TMC lennir Udayan Guha-i ashi. Tripura nung TMC züngsemtem amakba manenra Dinhata nung BJP züngsemtemi tiptema malitsü, ta TMC lennirisa ashi. Dinhata ya pa indang constituency lir. TMC-i iba ama amokmerenba ajanga BJP züngsemtem tila makümtsü ta BJP-i metetdaksüogo. Honibarnü Tripura kübok Ambasa nung BJP züngsemtemi

TMC züngsemtem amak aser iba nung West Bengal nungi lanur lennir asem dena liasü. Lar kinunger Abhishek Banerjee dena TMC züngsemtem amakba atema TMC tanishir Mamata Banerjee-i union home minister Amit Shah aitsüogo. "Union home minister indang teyari medeni iba amai meinyaktettsü" ta Mamata-i ashi. "BJP-i Tripura, Assam, Uttar Pradesh aser tangalen ozüing alema inyakba sorkartem ketdangsür. Tripura nung Abhishek aser ozü züngsemtem amakba aitsür" ta laisa ashi.



Assam nung mamatzü ayokertemi Morigaon nung aliba Higher Secondary School nem Rs 1 lakh tenla agütsüogo. Mamatzü ayoker 600 longjemer parnoki ayokba mamatzü litre shia nungi poisa tenla agütsütsü aser senji Sitajakhala Higher Secondary School nem tenla agütsütsü telemtetba agia liasü. Parnoki mezüing instalment ama school nem Rs 1 lakh cheque agütsüogo aser ano maneni school yaritsü tebilemba lir. Iba school ya Jagiroad Assembly constituency kübok Amlighat anasa lir aser kaketsür 150-200 shi azünger. (Jagiroad, August 10)

### Guwahati Police-i teküp ayokba maparen ka makdokogo

**Guwahati, August 10, 2021 (Agencies):** Assam nung Guwahati police-i teküp ayokba maparen ka makdokogo. Iba telok yagi Guwahati nung aser tangalen escort services agütsü. Iba dak sendakba nung police-i Nayanmoni Patowary, Saneep Kumar (Mukul Bhardwaj) aser Diya Sarmah (Junaki Begum) nungertem apu.

Mukul Bhardwaj-i pa kinungtsü Diya Sarmah (Junaki Begum) den külemi yaritepa teküp ayokba maparen inyak ta paisa nangzük. "Iba nung ajemdaker police-i Patharquarunungi Diya Sarmah (Junaki Begum) apu. Ajisiüaka, Mukul Bhardwaj ya jena oadak" ta Guwahati Police-isa ashi.

"Parnoki social media mesüra online inyakyim ajanga customers tem den tongtep aser anogo, tetsür aser jenjang latet" ta Guwahati Police-i ashi. "Teküp ayokba maparen ya Hotel Minerva, Panbazar nung mesüra Jiyabharali Apartment nung Mukul Bhardwaj aser Saneep Kumar nati para agüja ayuba takdangtem nung inyak" ta parnoki metetdaksü. Iba maparen nung tai tonglokja alir Nayanmoni Patowary ji Guwahati nung aliba Hotel Minerva nung manager inyaker aser pa ya August 5 nü apu. Patowary dang asüngdangya asüandang Saneep Kumar aser Mukul Bhardwaj nati iba mapa tongti süa inyakba kuli ashi.

"Mukul Bharadwaj-i amshiba mobile numbers bushitepdang Delhi nungi Bihar nungi Maharashtra tashi nung address aika ngutetogo. Pai mobile numbers 10-15 tashi amshiba putetogo" ta parnokisa metetdaksü. Bushitepa arudang pa Bihar kübok Lakhisarai district nung aliba tsüngsü bushitet. Iba jagi Crime Branch telok ka Lakhisarai-i yok aser August 8 nü pa apu. Mukul Bharadwaj-i tanga tesemtem nunga teküp ayokba maparen inyakba kulitem ngutetogo. Pa Guwahati-i anir arutsü aser parnoki mapa inyakba indang jungjunga asüngdangyatsü, ta Guwahati Police-isa ashi.



# TIR YIMYIM YIMOBILEM (EDITORIAL)

DIMAPUR RASEMNÜ, LUROI(AUGUST) 11, 2021

## Naga nungeribo masayatetsü na ?

India nungi Tokyo olympic nung adentsü asoshi nisung 228 yokba rongnung athletics asaya tapu balala nung asayatsü purtema 120 dak tali liasü aser item rongnung nü tsüshishiba, javelin throw nung mezüng takok jenjang angur, Neeraj Choprai anir taret ajungketba nung Maniputsür Mirabai Chanu, Assam nungisa asüyonga asenok kidanger Golaghat district nungi tsüngtepba nung Lovlina Borgohain, melangtepba nung Ravi Kumar o Bajrang Punia na, badminton asaya nung P.V.Sindhu aser hockey nung teburtemi tasembuba takok jenjang ngutetba takoktemji India asoshibo kum aika sülen anguba takok tuluka liasü. Iba jagi tepela marem governmenti dang masü saka kija kibongi dena takok angurtem nem sen crore junga senpet agütsüba osang asenoki angashir. Aji oda, takok angurtem dang nungi ano takok angurtem nem tenüngsang senpet den government mapa tajung agütsüba, ashiko, asenok Nagaland nung alir Naga nungeritem asoshibo tebangkatsüka asütsüa akok. Tangar state-bo asaya nung takok angur nem tepela tenüngsang sempet sen crore pongo trok agütsür saka asenok Nagaland state-bo kum piyong nung asaya tapu ajak asoshi government-i lemzütsüba budgetji anarongdena sen crore ka dang angur. Itemji kodang district shia nung asaya tapu shia atema lem süyonga odir, asayartem kenüa süngo mejemshi atatsü. Asen tiaji kodang tangar den medemdangdir, tangar dang tajungba kuma alemteta aotsüba jibo yutsür tangar meneptsüa ano kum aika agitsü amai reprangtetter. Ibaji bilemdang, tatishitsü agi, kodakernakasür Nagaland nungia Olympic asaya nung shilem agitsü asoshi nisung ka ao aser pa jagi takok bener aru ta ka asünunga, Nagaland government-ia pa nemji tepelaba tamaisü sen kwi agütsüla ta kanga rataa bilemer. Atangji, Nagaland government ya rongsen nung sensaker, kechiyong Nagaland nung rongsen mepoktetdaksütetter aser Delhi nungi yokba rongsen junga mamshir, anungji anogo shi makasa, akaba aser periba anogobo mali. Aji oda, asen lima nung rongsen makaba agi asenok timatemer masü saka rongsen anepalu mashiba agi asenok timatemer. Ajisüaka, asenoki rongsen bushi aser rongsen amshi shia nungdakba mapatem nung temulung agüja inyakra, tera agia mapa tuluka inyaktetsü aser asayaba maparen nung teraka temulung agütsü nung, Naga nunger tetsür aser teburtemji China aser Japan nungeritem dang nungi tekaraba, teyakyakba aser tajungba kumer alitsü. Item ajakji asenok Nagaland State Sports Policy nungbo alitsü imlar. Tanga mapatem dang nungi asayaba maparentem ya balaka, kechiyong asaya yabo asayartemisa anepalutsüla aser asayaba nung jangrartemiang asayartem ajungmesoa parnok nungdak peritsütetsü. Ajisüaka, aiben asenoki asaya indang memetetba aser mejangraba nisung nemang asayaba maparentem repringtsü nungloktsür. Tamakokji iba anogo nung jagi tenzüker. Asaya mejangrartem asoshibo Olympic aser World cup asaya yaa kecha masü, alima rongsen lalushiponga mapa meinyak asayaa amonger ta dang bilemstsü, anungji terepranga mereprangtsü. Ashiko, itemji asayaba maparen nung government-i sen lemzütsüa aliba amshinüba agi tapu tapu sports association nung shilem agir asütsü. India nunger asaya nung tangar memenebpa kuliji aji ka lir, kechiyong asayaba lokti tentettem ya asayar mongintemi anir masü saka yimsüsürtemi anir, anungji senotsü amshiba tsütsüji dang masü saka asayar shimbaren nunga aiben tajungtiba len masü saka metettepa aser jungtepa aliba pei telok tsütsü atsünga shimtsüsa ataloka alitsü. Atangji, kechi asaya südirsäka asaya ya melamelaa aser zübazübaa mapang endoka asayaba mapa ka masü saka anogo shia temang nung anibelem jenti agia asayapet asayaa alitsüba mapa ka lir, anungji tangar koka asaya ashitsüba yabo takar aser tulur chirnurtem mapa masü saka mapa temerang inyaker chirnurtem asoshi lir. Iba yongji asaya nung Olympic tashi takok angurtemji teimbaka sensaker kibongtem nungi timtema intetba purtem asür. Tetezü, asayartem ya tamasayongi asayadak tajung nung, asayaba oset tajung amshia chiyongtsü tajung shitak chia asayaa aruba purtem masü saka pei alidak mashimashi longzüa asayaba nungi tangari ajioktsüsa junga asayatetertem lir. Idakji asenoka tangazüktsüaika lir. Aji oda, asen lima nung government-i asayadak junga meyanglutsütetba aser asayartem nem nünngdak peria magütsübatetbaji dang Naga nungeritem lanurtem asoshi Olympic aser World cup metongtetba kuli masütsüla. Mapa ajak pei temulungtetba aser tazüokba dak dang keta lir, anungji Tsüngremi dang Naga nunger chanu nem asayatsü sempet agüja lira, iba sempetji Naga nunger chanutemia tangar dang nungi tajungba kuma amshitetsüla.

# OLEMSABANG ELECTION ASER TAMANGER

~ Rev. Dr. Noklen Longkümer, Pastor Ungma

(Yashi adok nungi...)

**Political party olulu agi na temangmangdaksü :**

Election mapang tiyazü olulu tzümetsüng ama ajaklen moshia ayimba ta ashitsü akok. Ochi meyipsa temesüzükba o tanang jembiba, zülüaprokshiba nem shinga tepuadaksü. Alima tesem ka lir koba nung kum shia anogo ka shimteta nisung shia pei-i inyaknüba inyaksüsa tenokdangba ozüngtem agina ayur. Shisa makari jabujari tim masüba yimya oda shiruru mesüka maksütsümapa odia bentshia iba anogoji süidaksür aser iba anogo dangji parnoki "Temenen anogo" (Devil's day) ta ajar aser iba anogoji tanü Nagaland State kong noklang shilem 90% tamangertem lir, itempur asoshi "polling day" ya kanga mesüka lir. Election mapang Khristan kibong sensaksem onük "esab kabo bendentsü tim" aser iba nukla atongtsü temelatibaji akok tashi tiyazü aika bendener ochi kumdakja candidate shibai parnok alizüng tongtsütsü akok pa/la atokdaksütsü inyaksangshidang pei jakla teti asoshi samar ta yimdangi marui temenen tebuti (Mojing) nem pei tanela taküm bendanga agütsütepba ya asütsü. Tir Yimyim Febuary 11, 2017-Yimobilem: Nübortem Tia-nung yamai zülua angur: America nung asemububa tir Thomas Jafferson jembiba; "Nüburtem dak alang government-a angutsü". Atangjitanü aliba government ya tamangertamang jenjang ka alang masü no ta bilemdanger. Oh, amangbapur, election arutsü aser aotsü, saka temenen mapatem election den külemi metempanger! Election mapang Laishiba tesayuba anema inyaksaba ajak Kibubai ne taküm kaket nung ojang ka danga metokshi-i aser mebendenloki zülüoka lir. Tsungrem O-i yamai ashir "Tesempatsü jabujaritem, yazüa bendenba rongsentem ajak mi aser mitsütsü mokozü agi jangrua aliba molumi nung pei shilem angutsü, aser aji tanabubatasüba asütsü (J.A. 21:8b)

**Election mapang sen asoshi kumdangang :**

2014election mapang sen tiemtiba intokba candidate mezüngbuba aser tanabuba asen Aor liasü. Constituency ka nung 45 crorestemaintokba tejangja osang angashia aruogo. Item rongsen ya shir meyong, kong nungi, koda shibai kechi atema agizük-mulungsenttsü nung taittsüba makai amshitetagama? Süpokrem amshia pei jenjang yangluba, süpokrem agizüka pei temeden yoka achir, anaprongla, kasa Tsüngrem aser nübur anema lir. Süpokrem temenen ya election nungbo temoatsü ka ama zungshir. Saka Tsungrem O-i ashir, "Nai süpokrem tagizük, kechiaser süpokrem ajanga shitak inyaksüba lenmang nungi nisung tenük pokdakja tai makaba nisungtem timtemdaksür." Anitet 23:8). "Shibai süpokrem meimer, aser tajangzük sülen anidaker; parnoki tebu malir mekümsüker mesüra parnok dangi aruba tilar asoshi ochi mapa meinyaker." (Isa 1:23). Süpokrem achir kitem ajak mitsü kuma rongdaksü." (Yob 15:34). Iba ama kecha manungi rongdaksüba temenen rongsen nungi pila-a liang! Nü juri temeden amshia ali yimli yangluba nung shilem agiba vote inokdak süngden mangutsüsa süpokrem nem na tashiokdaksü!

**Election mapang ne mulungjang kanga mita Liang :**

Election mapang amangbapur libaliro ya ken bilemdangra oda anung tom nung apungdaka aliba oset ka kong koda tsüka akusatsü shingai meshitetba ama lir. Election tembangbo saka tejashitsüka sabontzüagi meshitoktettsüsa kija aser kibong, arogo aser yimden dak tarak tur telushidak maka tansütsütia nung aliba angur. Tsüngrem O-i ashir, "Temulungjang nung mashikoshia alirtemji Kibuba tsüngdang tesempatsü, pa memerenshi-i malitsü (A. Shin 11:20). Election anasa arudang, amangbapur ajaki pei mulungjang kanga nendaka mita litetsü asoshi Tsüngrem dang maneni shisatsü meshia alitsüla. Kechiaser tanü asen lima teraksa agi sünga aliba ya tangalen nungi mopungi oner aruba masü mulungjang mita maliba nungi atokbatem lir. (A. Shin 4:123). Jacob aser Rachel najabaso Yosep yimtenren nung tongti nisung ka liasü, ajaki mulunglemtettsüsa temulung tindang aser jaklatemerük agi yimsüsüa nübur dangi teimla aser temoatsütulu bener arutsüba indang Lipok 39 nung shia angur. Yamaji Daniel-a yimsüsür tongti ka liasü. Pai temesepba chiyongtsünungi pila litet aser aji oda külem tongtipur süngmangtsüsa ajak dang nungi pa shisa takaba aser terajemba liasü (Dan 1:18). Alima ajak tebu ta ajatsüsa Abraham liasü (Lipok 22:17-18). Anung kübok alir rongnungi ajemalutiba lenir Mosa liasü, Pharoah chubatiba dang nungibo pai Tsüngrem tali meim (Heb 11:24-27). Ochi agi yimden yanglur Yosep, Daniel, Mosa aser Abraham, parnok ajak asenok ama meimchir liasü. Parnoki inyakba ama inyaktetsüpur tanü ozü Nagaland nem maojang ta Kibuba dang meshitsü ilungdi. State nung mezüngbuba aser tanabuba election nung shimba lenirtemibo pei mapang, sempet aser shisatsüajak tenla-a nübur asoshi inyaka aru kechiaser parnok dak rongsen masü nübur meimba jakla aser tanela tajung aliba ngua nüburtemiang ajungshia election nung nokdaksü ajungshi. Tanü Nagaland nung aliba tamanger asoshi mezüngbuba aser tanabuba State general election tanela nung agitsü kanga takoktsü liraser atangji ibaji dang asen State asoshi shitakba tanebtsü mozü asütsü. Oh, Nagaland Khristantem! Tsüngrem sentong atalokdaksütsü asoshi tajungtiba mapangji election ya lir. Kechiaser Ballot-box tashi dang nungi Tsüngrem tashi tuluba lir. Political party oladang masü Tsungrem O dang-ang tashi angaba tamanger asütsüla. Kechiaser Tsüngrem sentongji "Tematibai ali yimli ajak madak yimsüasür aser Pa yimli putusa putu alir. Pa tsüngdang alimanung alir shinga jentoka mali, alima aser kotak nung Pai kechi mulunger aji Pai inyaker ta jungkai atoka sayuba ya lir. Kechiaser tsüngkum aser mapang ajak Tematiba kabu nung lir, aser yamaji Pai ali chubatem agiener aser ano Paisa chubatem mendaksür" (Dan 2:21). Tamangeri yashi tashi election nung koda aser koma shilem agia aru ken meyipa bilemdangra, Tsüngrem meimba dang nungi sen tali meimyong senso temeten senyong yokshiba, tashiyim agi tangar temeten rakzükba aser ochimashi inyakyim nung shilem agiba dang bilemtetsü aser aji hua ta agizüktetra, tanü asen lima tia ya tangari masü aseni inyaksaba ta-a ta shitetsü tim. Tamangeri dang Tsüngremi mulungba ama election nung shilem agitetra, atangji nübur asoshi tajungtiba yimsüsür shimtsü Tsüngremi inyaksü kechiaser aji Pa mulung. Tamangeri tamanger ama mapang ajak nung oda, election mapangbomaden ta masü shitakba tamanger ka ama litetra, Tsüngremi Nagaland atema tajungtibaji inyaksü mulunga lir.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir**

## Laishiba meyiptsü atema Wycliffe USA-i SpaceX satellites amshir



SpaceX CEO, Elon Musk

**August 10, 2021:** SpaceX CEO, Elon Musk-i orbit nung satellites yoktsü aser akokba tashi nisung aika nem high-speed broadband internet agütsütsü, ta nangzükogo.

Iba osang dak sendakba nung Wycliffe USA nungi Andrew Flemming-i, iba project (SpaceX Starlink satellites project) ajanga Khrista osangtajung prokba wadang nunga tajangzük kanga angutsü, ta metetdaksü.

Orlando nung amenoka aliba Wycliffe Associates-i alima tesem ajaklen Laishiba meyipzükertem den longjemer project 700 dak tema inyaker.

Flemming-i, "SpaceX-i orbit tesem ajungalen satellites meyrjang aika yoktsü. Iba technology amshia onoki kanga tezülen aliba tesemtem nunga Laishiba meyipba mapa inyaktetsü, kechiyong tamalenbo onoki iba mapa ya mela-melabo meinyakteti liasü," ta metetdaksü.

"Tsüngremi item ama hadir amshir aser Laishiba meyipba mapa tekaraba nung inyaktetsü atema item hadir amshir, koba ajanga alima tesem ajungalen nisung aika kongshitsü," ta paisa metetdaksü.

"Wycliffe-i tamalen-a satellites amshio, ajisüaka itemji geostationary mesüra geocentric satellites dang liasü. SpaceX Starlink satellites

ajanga kanga tekaraba nung onok mapa inyaktetsü," ta Flemming-i ashi.

"Onoki iba ya US nungbo tendang tenzükogo. Taruba ita 18 mesüra küm ana tsüngda satellites network kanga junga angutsü imlar, koba ajanga alima nung kanga tezülen aliba tesemtem nunga onoki network jung angutsü," ta pai metetdaksü.

Iba ya ajanga Sima ama kanga tezülen aliba Laishiba meyipertem atema mapa tezübaba akümtsü, aser iba ya Tsüngremi sempet lir, ta pai ashi.

"La (Sima) ya tanur tetsü ka lir aser la ki tila ka nung alir. Solar panel ajanga dang lai computer charge asür, aser la yim tilaka nung alir," ta Flemming-i ashi.

"Mapang shia lai kinü tanur den computer ajunger arem ajanga ghonda ana jaja tenemtsüngleni lua jila ka nung internet cafe kati aoer. Internet cafe nungji la densema Laishiba meyiper team-i internet amshir," ta paisa metetdaksü.

Sima-i Spacelink satellite network ama high speed internet ngura lai tekaraba nung mapa tembanga inyaktetsü.

"Onok technical team-i tayongzükba aika ajurudar anungji onok asoshi sarasademjang aser technology tasenba atema sarasademjang,"

ta Flemming-i mepishia metetdaksü.

"Lasihiba meyipba maparen nung tongtibang mera ka agitsü atema sarasademdaksüner," ta paisa metetdaksü.

Mapang shia Wycliffe-i Laishiba meyipba maparen nung tayongzükba balala ajangshir. Yaküm Nigeria nunga coronavirus wara aliba den külemi linük tesem ajungalen kiralongrartemi timtem agütsüba ajanga Nigeria nung Laishiba oshi 30 nung meyipzükba projects anena liasü.

1967 küm tentetba Wycliffe Associates-i Arogotem den longjemer Laishiba meyipzükba mapa nung yariteper, ajioda parnoki Nigeria nunga Nigerian Bible Translation Trust den longjemer inyakdar.

Nigerian Bible Translation Trust-i Tejen Lai aser Tasen Lai naprongla indang project aika inyakdar. Nigeria nung nütsüng million 200 shi lir aser oshi 500 dak tema lir. Ajisüaka 2020 küm nungi Laishiba meyipertemi tongtibang tesemtem nung madenshiteter aser Laishiba meyipba maparen nunga meyariteter.

Wycliffe-i Nigerian Bible Translation Trust den senteper Laishiba meyipertem nem training agütsüba dang masü saka senotsü-a agütsür, ajisüaka 2020 küm item projects inyaktetsü aliba sentong ajak thinena liasü.

## Tenla ki bendoktsürtem nokdangdang Pastor ka jabaso khaset

**August 10, 2021:** August 5, 2021 nü Borno State yimtiba, Maiduguri nung sorkar ketdangsertemi EYN Arogo Tenla ki bendoktsüogo.

Tenla ki bendoktsüba mapang iba Arogo nung pastorba'er jabaso arrshi küm 29, Ezekiel Bitrus Tumba-i Tenla ki bendoktsürtem nokdangba mapang nung khaset.

Osangbenertem senden ka nung Christian Association of

Nigeria (CAN) Chairman, Williams Naga-i pastor jabaso khasetba aser Tenla ki bendoktsüba atema sorkar aitsü.

Williams Naga-i, "Borno Geographic Information System (BOGIS) executive secretary, Engr Adams Bababa leniba nung ketdangsertemi CJTF anir arua Tenla ki bendoktsüba dang masü saka ozü adianu aser jabaso-a tepset," ta metetdaksü.

Amongnü (August 8) Khristantem Tenla ki meliaka iba kimong nungji adenshia tekülem sentong agiba den asür atema mangyima liasü.

Guardian Nigeria-i ashiba agi, kasa area nungjisa tanga Tenla ki pezü-a bendoktsüogo, aser item Arogotemji Jubilee Sanctuary Church, Total Gospel Mission International, Sanctuary Church, aser Christ Forever Land lir.

## ANO GO ABEN TSÜNGREM DEN

### Talila talubusa

*Tang, asenok dak inyakba ain amato, shibai asenoki asüngdangba aser bilemba ajak dang kanga tali inyaktetsü akoker. Efesa 3:20.*

Tsüngrem asoshi aser Pa arogo asoshi mapa meranga inyakba agi asenoki Tsüngrem peladaksür ta bilemer. Aji saka Tsüngremi nisung tesüngmangtsü ka yangluba nisung tejangraba agi Pa peladaksür (T.Ken 8:3-4). Tsüngremi na ajanga inyakba mapa dang nungi tuluba nai ne sasa ne alizüng ayutsü makok. Tangar dang nungi tali Tsüngrem peladaksütsü asoshi Tarsus nung Saul mapa tangar dangi tali pai meranga inyak, saka pai meranga inyak nung Tsüngremi pa taküm asoshi inyakba den medemdang dang pa mapaji jana rüja dang liasü ta pai bushitet. (Fil. 3:7-8).

Asenok tebilemtsüji aseni yangluba sentong nunga aseni melamela jangratemer. Asenoki tamaren mapa inyaktetsü merangra asenok taküm nung tashi teperi akatsüla, iba jagi Tsüngremi asenok dang pelatsü ta bilemer. Tsüngrem nungi tajaba asenoki mangashi tashi asen taküm indang asenoki nukla dangi arutsü makok mesüra Tsüngremi asenok ajanga ataloktsütsü taaka bilemtsü makok.

Asenoki bilemba dang nungi Tebui Pa aini asen tashi mait atendanga oa angur ta asenok sasa bilemtetsü tenüngdaksü lir. Asenoki asen tebilembaji tesülen yutsütsüla. Asenoki asen pungmangtem nung temulung süa malitsüla kechiaser itemji kechi koma jangratemtsü südir süang teti atema masü. Kodang asenoki Tsüngremi tuyuba nung odir asen taküm nung Tsüngrem mapa inyakba aseni metetsü aser ibaji Pa tashi ain dena aliba ajanga dang rasaa ashitsü akok. Ajak nung asenok koda temulung süa alitsü?

## China nung House Church Pastor aser kinüngtsü na dang senchi achi

**August 10, 2021:** China kübok Xiamen nung House Church ka nung pastor aser kinüngtsü nati tekülem sentong ayongzükba agiba atema sorkar ketdangsertemi tena dang senchi tulu chiogo, ta International Christian Concern-i metetdaksü.

China Aid osang ajanga ashiba agi, July 29 nü Siming District Ethnic & Religious Affairs Bureau ketdangsertemi Xiamen nung aliba Xunsiding Arogo nung sayutsüngir, Yang Xibo aser pa kinüngtsü, Wang Xiaofei na nem shidi ka agütsü.

Ketdangsertemi shidi ajanga tena dang, April ita nung nenati Lihong Hall, Pan Pacific Hotel nung ozüng alema tekülem sentong agiba atema senchi 200,000 RMB (\$30846) agüjang, ta metetdaksü.

Pastor aser kinüngtsü na dang anogo asemnü tsüngda telangzüba agüjang mesüra ken o angadangtsü atema anogo pongunü tsüngda ken o benokang, ta metetdakja liasü.

Sayutsüngir Yang-i sorkar ketdangsertemi melaba Three-self church nung adentsü memelungba sülen nungi Communist Party sorkari Xunsiding Arogo anema inyaka arudar.

Pastor Yang-i mapang shia linük nung Khristan yimsü temeden alema inyakba atema sorkar aija arur.

2019 küm May ita nung mezüng iba Arogo anenja liasü, iba sülen iba Arogo aiben mita aruogo. Taküm February ita nunga office building ka nung Arogoi campus ka amenokba atema house church dang senchi chia liasü.

April 17 nü Khristantem Pan Pacific Hotel nung adenshia aliba mapang nung police arua takdang mita ao aser Khristantem ajak noksa tangoka liasü.

Tawa ketdangsertemi shidi ka agütsüba sülen-a pastor Yang-i social media ajanga, "Ano tongbang ka arudar, anungji yimlibilema sarasademjang," ta metetdaksü.



# Onoki J&K nem state jenjang agütsütsü akhanger: Rahul Gandhi



Srinagar nung Jammu and Kashmir Pradesh Congress Committee office nung Congress Bhawan tasenba semzüksüba mapang Congress lenir Rahul Gandhi-i party züngsemtem den o jembiba noksa nung angur.

**Srinagar, Luroi/August 10 (Agencies):** Mongolbarnü Srinagar nung party züngsemtem den o jembiba mapang Congress lenir Rahul Gandhi-i, onoki Jammu and Kashmir nem state jenjang agütsütsü aser democratic inyakyim kübok election agitsü atema benoktsü khangogo, ta ashi.

Rahul Gandhi, shiba tang J&K semdangba mapang ka lir, pai Srinagar nung party office tasenba semzükja liasü. "Ozü kibong Allahabad nung lia liasü aser iba masüdang idaki lia liasü. Ni iba tesemi aibenbo maru saka ni nenok terabo angateter. Nia shilem tilakabo Kashmir nung lir," ta Gandhi-i ashi.

Paisa, J&K nung tashiji kati

ka taoba ta züngshitepba aser parnok libaliro lir aser tesempatep prokshirtem nüburtemi kodanga magizüksü, ta ashi.

"Ghulam Nabi Azad-i kü dang Parliament nung Kashmir ken o benoktsü ashi. Ajisiaka onok nem o jembitsü temelaba magütsür ta nenok nem metetdaksüner. Pegasus, ochimashi aser unemployment amala ken o aika ni benokner, saka onok nem jembitsü maongka magütsür," ta Congress lenir Rahul Gandhi-i ashi.

"Tanü J&K dang masü saka linük nung judiciary, Rajya Sabha aser Lok Sabha amala institution tem lendong nung lir. Media dena amokmerener aser ochi prokshitsü atema parnok

tsübur. J&K ajungkettsü atema Congress yimsüsüba mapang benokba inyakyim kanga mejungi raksaogo," ta pai ashi.

Gandhi-isa, pai J&K nem state jenjang tanaben agütsütsü aser tebandang makai election agitsü pusemer aser Srinagar nung party office tasenba ya iba Union Territory nung party atema tetenzük tasen ka asütsü, ta ashi.

"Ni Narendra Modi aser azütokshitsü aser India lemdangtsü atema pa tebilemdangba den raratsü. Ni tesempatep aser tetsübu anema raratsü. Congress party ya temeim aser yimjung prokshiba party ka lir. Ni yakta Jammu aser Ladakh semdangtsü," ta pai ashi.

# Covaxin yanglutsü atema Ankleshwar plant nem temelaba agütsü

**Hyderabad, Luroi/August 10 (Agencies):** Union health minister Mansukh Mandaviya-i Mongolbarnü sangdong ka ajanga sorkari Ankleshwar, Gujarat nung Bharat Biotech indang vaccine yangluba facility nung Covid-19 vaccine Covaxin yanglutsü atema temelaba agütsüba metetdaksüogo.

Minister-isa, iba jenjang agiba ajanga linük nung yanglutetba vaccine timba akümtsü aser linük ajunga nung tang vaccine agüja aliba sentong nung teyari agütsütsü, ta ashi.

"Sorkari Ankleshwar, Gujarat nung vaccine yangluba facility nung Bharat Biotech indang Covaxin yanglutsü temelaba agütsüogo," ta Mandaviya-i tweet asü.

"PM Narendra Modi indang Sabko Vaccine Muft Vaccine sentong sülen anidaka iba jenjang agiba ajanga linük nung vaccine

timba yanglutetsü aser alima nung vaccine agütsüba sentong tulutiba ya takaratiba nung inyaksangshia aotsü teyari agütsütsü," ta health minister-i ashi.

Bharat Biotech-i taküm May ita, rabies vaccines yangluba Ankleshwar BSL2+ facility nung küm nung Covaxin dose million 200 yanglutsü sentong aliba lemsatepa liasü. Ankleshwar facility nung yangluba vaccine tem September ita nungi angutsü, ta company-i tawa metetdaksü.

Bharat Biotech-i ashiba agi, parnoki Ankleshwar aser Bengaluru anasa Malur unit nung June ita nungi Covaxin yanglu tenzükogo.

Ankleshwar nung facility ya Bharat Biotech-i 2019 küm tetenzüklen Chiron Behring Vaccines Pvt Ltd alizükba nung shilem ka ama GlaxoSmithKline Asia ket nungi alizüka liasü.

# National NRC dak sendakba nung telemtetba kecha magi: MHA

**New Delhi, Luroi/August 10 (Agencies):** Ministry of Home Affairs-i Mongolbarnü Lok Sabha nung, sorkari National Register of Indian Citizens (NRC) renemtsü atema kecha telemtetba magi ta metetdaksü.

Taoba ita MHA-i Parliament dang Citizenship Amendment Act mesera CAA kübok temzüng ozüng renemtsü atema ita trok bendenloksütsü mapang meshiogo. MHA-i ashiba agi, parnoki Lok Sabha aser Rajya Sabha naprongla nung iba dak sendaka aliba committee dang 2022 January 9 nü tashi mapang agütsütsü mepeshia asüngdangogo.

Kasa mapang nung MHA-

isa, Lok Sabha nung Rohingya nungertem ozüng alema inyakyim balala nung shilem agiba indang osang metetdaksü. Centre sorkari state sorkartem nem tetuyuba agütsüogo.

Administrations-i state tem dang law enforcement aser intelligence agency tem nem ozüng alema bendanger arua aliba dak sendakba nung jenjang tapet agitsü asoshi iba ken o indang metetdaksütsü tetuyuba agütsüogo. Item bendangertem temzüng ozüng kübok tesem kari aotsü memelaba indang metetdaksütsü, parnok indang biographic aser biometric particular tem bendentsü, India indang kuli kakat tiala bena

alibatem thitsütsü aser temzüng ozüng kübok parnok aruba tesemi meyipa yoktsü atema jenjang agitsü tetuyuba agütsüogo. Temelaba agütsür aliba mapang alia India nung alirtem aser ozüng alema arurtem indang ken o achaayangtsü atema March 30 nü tetuyuba agütsüogo, ta MHA-isa ashi.

Tang mezüngbuba MHA-i, ozüng alema arua aliba bendangertem ket nung aliba India indang kuli kakat tailatem thitsütsü aser temzüng ozüng dak ajemdaker parnok meyipa yoktsü atema parnok indang biographic aser biometric particular tem bendenba indang shisemogo.



Prayagraj kübok Baghara tesem nung ganga ayong moshia ayimba ajanga pei ki metsüngbanger alirtem nem National Disaster Response Force (NDRF) team-i relief osettem lemetsüba noksa nung angur.

# India nung dang Afghanistan toktsür aotsü tuyu

**New Delhi, Luroi/August 10 (Agencies):** India-i Mongolbarnü Afghanistan nung aliba lisopurtem dang tayimtsü service manentsü tsüngda kidangi meyipa aotsü renemtsü tetuyuba agütsüogo.

Afghanistan nung Taliban aser security forces na tsüngda rara tulu adoker aliba mapang ka nung iba tetuyuba agütsüogo. Indian embassy nungi tetuyuba ka nung, Afghanistan nung inyaksangshia aliba India nung compant tem dang tayimtsü service manentsü tsüngda project balala inyaka aliba tesemtem nung India nungertem anintsü metetdaksüogo. June 29 nü nungi tenzük mission-i tang agi tasembenbuba India nungertem nem security tsütsü tetuyuba agütsüogo. Parnokisa nungdak makaba nung senzusenpong masütsü tuyuogo, kechiyong

parnok pur aotsü ana nung lir, ta ashi.

India-i Mazar-e-Sharif yimti nungi ketdangsurtem aser India nungertem Indian Air Force tayimtsü ka nung anin tenzükba sülen iba tetuyuba agütsü.

Mongolbarnü security dak sendakba nung tetuyuba agütsüba nung, Afghanistan kübok tesem aika nung rara adokba sülen province aser yimti aikati tayimtsü meyoki kümogo, ta ashi.

"Afghanistan nung aliba India nungertem aser mapa inyakerterem dang Afghanistan kübok tesem balala nungi commercial tayimtsütem indang osang agia atatsü aser commercial air services meshibangtsü tsüngda India-i meyipa aotsü atema anepaluang," ta tetuyuba nung shia lir.

(Maneni tapak 10 nung...)

**HSSC Hydrocarbon Sector Skill Council**  
9th Floor, Hindustan Times House, 18-20 KG Marg, New Delhi-110001

Societies Registration Act, 1860 nung züngoksema aliba society, Hydrocarbon Sector Skill Council (HSSC)-i teküboklen agüja aliba mapatem atema tejangrar candidate tem jaoker.

Chief Executive Officer (CEO), HSSC					
1.	Tejangertertem parnok indang educational qualification, küm, experience amala kuli kakattem peisasa attest sür advertisement sangdongba sülen anogo 15 tsüngda hr@hsscindia.in dangi yoktettsü.				
2.	Functions/Post	Manager	Asst. Manager	Executive	Total
2.1	Standards and QA	01	01	01	03
2.2	Training of Trainers & Assessors	-	01	-	01
2.3	Curriculum/content Development	01	01	01	03
2.4	Affiliation and Training Delivery	-	-	01	01
2.5	Information Technology (IT)	-	-	01	01
2.6	BD -State/Industry Interface	01	01	01	03
2.7	Finance & Accounts	01	-	-	01
2.8	HR & Administration	-	01	-	01
2.9	Apprenticeship	01	-	01	02
<b>Total</b>		<b>05</b>	<b>05</b>	<b>06</b>	<b>16</b>

Advertisement sangdongba sülen anogo 15 tsüngda temsüa aliba candidate temi online ajanga apply sütettsü.

Temalen agüja aliba mapatem ajak atema description, eligibility aser tanga osangtem HSSC website [www.hsscindia.in](http://www.hsscindia.in) nung angutsü.

Sd/-  
CEO, HSSC

davp 33115/11/0001/2122



Pakistan aser Afghanistan tsungta arrtsü alema senzüba tesem ketdangsürtemi anogo ishika tejakdang shibanga aliba lapoktsü indang osang metettsü asoshi arrtsü malemteti aliba nisungtem Chaman, Pakistan nung sepai alidaki aruba noksa nung angur. Anogoshi Afghan aser Pakistan nung nisung meyerijang aika iba tesem ya ajanga senzür, aser Pakistan kübok Karachi yimti nungi osettsüset tabu balala bener Afghanistan-i iba tesem ya ajanga aor.

### Myanmar nungi UN envoy amaktsü kecha sentong mali: Junta

**Yangon, Luroi/August 10 (Agencies):** UN dangi Myanmar ambassador amaktsü asoshi sentong yangluba nung Myanmar indang junta densema mali ta metetdaksüogo. Pai military tetuyuba sülen manidaki pro-democracy movement pusema liasü, ta state media sangdong ka ajanga Mongolbarnü metetdaksü.

February ita army-i sorkar atsüngtokba sülen Kyaw Moe Tun-i, UN nung pa linük tenung nungi menokdaker ta shia liasü.

Taoba hopta United States prosecutor temi, Kyaw Moe Tun tepsettsü atema nisung tepseter ka hire asütsü tasa asaba atema Myanmar nung ana aitsüogo, ta ashi. Parnokisa, pa mapa nungi anentsü atema nongshitsü aser mangara tepsettsü atema tasa asaa liasü, ta ashi.

"Iba tatalokba dak sendakba

nung Myanmar kecha sendaka mali," ta state meyong Global New Light of Myanmar osangkaket-i Mongolbarnü metetdaksü. Iba tatalokba dak sendakba nung junta-i Mongolbarnü mezüngbuba telangzüba agüja liasü.

"Linük temzüng ozüng dak ajemdaker jenjang agütsü tim," ta kasa sangdong ajanga metetdaksü.

Temulung melemi bilemer Phyto Hein Htut, 28, aser Ye Hein Zaw, 20 na federal court kati aitsüogo aser iba atema tena küm pongu tashi tepuokdak ayutsü akok.

Prosecutor temi ashiba agi, Phyto Hein Htut-i Thailand nung prangbong hadir shishilembar ka den tongtepratepa liasü. Iba nisungba ya Myanmar nung military den sendaktepa lir.

Prangbong hadir shishilembar sang yagi Phyto

Hein Htut den nisung tepseter ka hire asütsü atema jembia liasü, kong ambassador indang gari raksaja tsükokdaksütsü atema tasa asaba densema lir, ta ken o benokba nung shia lir.

Myanmar nung military-i sorkar atsüngtokba sülen military anema nokdakertem nisung 900 dak tema tepsetogo.

Kyaw Moe Tun, shiba linük ashioktsüba ken o nung Myanmar nung aputsü tetuyuba agütsür lir, pai alima kin balala dang civilian sorkar tanaben amenokshitsü atema teyari meshia arudar.

Taoba hopta pai UN Secretary-General Antonio Guterres dangi shiti ka nung July ita Myanmar kübok Sagaing tesem nung military-i civilian 40 tepsetba osang adokba indang metetdakja liasü.

Junta-i iba taittsüba magizük aser AFP-ia iba osang tejangja mongutet.

### Haiti Tir Moise tepsetba bushisüngdangtsü obendanger ka shim

**Port-au-Prince, Luroi/August 10 (Agencies):** Haiti Tir Jovenel Moise tepsetba bushisüngdangtsü asoshi lenir ka shimtsü hopta aika timtema arur obendanger ka shimogo, ta senior magistrate kati sangdong.

Port-au-Prince nung aliba Court of First Instance indang dean, Bernard Saint-Vil ajanga ashiba agi, iba mapa atema Judge Mathieu Chanlatte shimtet.

Chanlatte ya amokmeren masütsü, ta National Association of Haitian Magistrates indang tir, Jean Wilner Morin-i ashi.

"Iba bushisüngdang ya mapang agütsü. Magistrate Chanlatte nem ketdangsüri tashi ajunga agütsütsü aser pa takum kumzüka ayutsü imlar," ta Morin-i ashi.

Sen agütsür nisung

tepseter telok ka tir aliba kidangi July 7 nü ait aser Moise khaset. Iba lendong nung pa kinungtsü Martine yirua liasü, saka la kumzüktet.

Meimchir temeden asoshi nokdaker Pierre Esperance-i ashiba agi, ozüng nem len anidakja aser yimtenren tsütsü nungi mesüi Chanlatte-i iba ken o shidak bushisüngdangtsü imlar.

Minister of Justice and Public Security Rockefeller Vincent-i ashiba agi, par ministry ajanga obendanger takum kumzüka ayutsü aser okadak kuli bendenba wazüka ayutsü asoshi nungdakba mera ajak agütsü.

Moise tepsetba dak sendakba ken o nung nisung 44 puogo aser item rongnung Haiti nung police 12 aser commando team nung shilem

agir Colombia nung nisung 18 aser Haiti nungi jakzüker America nung nisung ana dena lir, ta police-i ashi.

Pua alirtem rongnung Moise anüker rongnung tekolakba dena lir, aser iba tasa ya Haiti nung telok kati bendanger den sendakteper yanglu, ta tai tonglokja lir.

Makamait aser alimar lendong balala agi sünga aliba Haiti linük nung Moise-i yimsü süa liasü, kong nisung telok balala tsüngta azüdokshi aser coronavirus agi nüburtem timtemba mapang ka lir.

Police temi iba ken o dak sendakba nung ano nisung kar aputsü sangdonger bushiba mapang lir, aser item rongnung Haiti indang tematiba court nungi obendanger ka, taoba mapang senator inyaker ka aser shishilembar ka dena lir.

### Bangladesh nung Rohingya nung nem Covid-19 vaccine agütsü tenzükogo

**Dhaka, Luroi/August 10 (Agencies):** Bangladesh alima nung refugee camp tulutiba nung Rohingya nung tem nem vaccine agütsü tenzükogo. Linük nung COVID-19 tashidak menar tali küma aoba mapang ka nung tang iba inyakyim tenzükogo, ta ketdangsürtemi ashi.

Cox's Bazar nung amenoka aliba refugee camps tem aser iba temeket nung aliba district tem nung wara poktetra timtem tulu adoktsü ta teyari maparen balala inyaker temi tekümdangtsü metetdakja aruogo. Myanmar nungi jena aruba sülen Rohingya nung million aika Cox's Bazar nung jenoka lir.

UN agencies temi teyari agüja Mongolbarnü nungi Brehostibarnü tashi nung Rohingya nung arishi küm 55 tempur nisung 48,000 shi nem vaccine agütsütsü, ta Cox's Bazar district nung chief health official Mahbubur Rahman-i ashi.

"Iba ya tetenzüker dang. Shilem balala küma lensar

Rohingya nung tintettem ajak nem vaccine agütsütsü," ta Rahman-i camp nung vaccine centr ka nungi telephone ajanga Reuters dang ashi.

Kasa mapang nung Myanmar kübok Rakhine state nung ketdangsürtemi osangbener dang ashiba agi, iba tesem nung aliba Rohingya nung nem vaccine agütsütsü atema tang tashi nungbo kecha sentong mali.

Hopta ishika Bangladesh nung covid tashidak nisung aika dak poteta lendong nung lir aser tang tashi nung nisung million 1.36 tema dak tashidak potetogo asre nisung 22,897 süogo.

"Camp nung aliba nüburtem ya vaccine magiteti lir. Iba mesen nokdangtsü atema vaccine agütsü kanga tongtibang lir," ta International Federation of Red Cross & Red Crescent Societies' Cox's Bazar tekolakba Hrusikesh Harichandan-i ashi.

"Camp nung alirtem nem vaccine agütsütsü atema national aser international lokti tentettem longjemer inyaktsü nungdaker," ta paisa ashi.

### Algeria morok mi lendong nung nisung tenet asü



**Algiers, Luroi/August 10 (Agencies):** Algeria nung morok mi tuluba jangrua aoba mapang nisung tenet süogo aser nisung ana kangasa mejungi yiru, ta civil defence ketdangsürtemi Mongolbarnü ashi.

Ki kar mitsü kuma rongdok, ta state radio ajanga ashi, aser al-Bilad osangkaket ajanga ashiba agi, iba morok mi nungi jenshia aoba nüburtem ya Tizi Ouzou nung aliba school tem nung anidener.

Tizi Ouzou province ya linük yimtiba, Algiers nungi anüdoklen kilometer 150 shi pilar lir.

Hombarnü nungi mi remseptsü meranga aruba civil defence pur den civilian temi yariteper, ta al-Bilad ajangasa ashi.

Algeria kübok province 14 nung morok mi ya tesem 19 nung adoka lir.

Tawa Europe aser United

States kübok tesem aika nung morok mi maneni jangrua arur.


Greece nung firefighter temi anogo aika mi remseptsü meranger, kong nisung meyerijang aika pei kidang nungi anizüker ogo. Taoba hopta tenzükba morok mi ya linük nung mapang talangka kanga atsükba ajanga lir, koba küm 30 dak tema nung tamajungtiba liasü.

Turkey nung tzunglu aruba ajanga anisüngzük tera angu, kong firefighter 5,000 dak tema anogo 11 morok mi remsepa liasü.

Russia nunga tesem 250 dak tema nung morok mi jangrua lir, aser iba linük nung Siberia northeast region nung tamajungtiba kongshi.

United States kübok California state nung morok mi aisü nung jangrua lir, aser yangji nisung ti samar bushir, ta ketdangsürtemi Honibarnü shia liasü.

## Opang Jamir-i Liso Brand Ambassador inyaktsü



mamshi yangluba product tem anguba ya ajak atema temoatsü. Nagaland nung adokba osettsüset/chiyongtsü tem ajungkettsütsü asoshi asenok ajaki "vocal for local" mapatong pusemstsüla," ta Opang-i ashi.

Liso Brand Ambassador inyaktsü shimba asoshi pelar aser iba maongka temoatsü ama agizüker. Tainlonglong tetsür aser tebur tem dang mozü mamshi yangluba product tem amshiba tajangzüktem metetdaksütsü atema tekümdangtsü osang sangoktsüba mapatong nungittsü. Ajasünung, tarutsü anogotem nung school aser college tem semdangtsü. Anungji, College aser school kar danga tejangraba lira, Instagram ajanga Liso\_Pure\_and\_natural den tongteprateptsü akok, ta pai shisem.

Tanü (Mongolbarnü), mezüng Campaign Photoshoot nung, Creative Director aser stylist - Femina Miss India Nagaland 2018 Ruopfuzhano Whiso liasü. Kasa mapang, Photographer Qhevika Swu, Make up & Hair- Arho Kajiiri na liasü aser Akim Homestay Kohima nung iba sentong agiogo.

**Dimapur, Luroi/August 10, 2021 (TYO):** Liso Pure and Natural "Made in Nagaland" atema Naga nung Supermodel aser taoba mapang Mr. International India 2012, Opang Jamir-i brand ambassador inyaktsü.

Liso tenzük aser iba brand nung 'beauty', 'skin care' aser 'health product' balala 35 dak tema lir. "Liso ya Nagaland nung yangluba 'Organic Skincare' aser cosmetic brand ka lir. Market nung anguba product timbaka nung 'paraben' dena lir, saka Nagaland nung mozü

Testüba küm ana tejangdang

## Dimapur nung 'Smoke-Free District Headquarters Campaign' tenzüktsüogo



Dimapur, Luroi/August 10, 2021: Commissioner of Police Dimapur, Rothihu Tetseo ajanga Dimapur nung 'Smoke-Free District Headquarters Campaign' tenzüktsüba mapang tangokba noksa ka yangi angur.

**Dimapur, Luroi/August 10, 2021 (TYO):** National Tobacco Control programme, Dimapur-i 'Smoke-Free District Headquarters Campaign' tenzüktsüba sentong ka ayonga agiogo. Iba campaign ajanga State kübok district headquarter shia 'Smoke-free' kümtsütsü nükjidong yur inyaktsü, ta sangdong ajanga metetdaksü.

Commissioner of Police's office, Dimapur indang conference hall nung Health & Family welfare Department nung ketdangsurtem aser station balala nung police officer tem den Commissioner of Police Dimapur, Rothihu Tetseo-i iba campaign tenzüktsü liasü.

Iba Smoke-Free campaign mapatong takok angutsü asoshi

bendanga agüja aser temlungtetba tulu nung inyaktsüla ta Rothihu Tetseo-i District Anti-Tobacco Squad indang team züngsemtem ajungshi.

Nüburtem dang 'Section 4 of Cigarettes and other Tobacco Products Act 2003 (COTPA)', koba lokti aliba tesem nung moko achiba nokdang, iba temzüng indang metetdaksütsü asoshi, pei mapa inyakba tesem nung tekümdangtsü temaitsü (signboard) yutsütsüla, ta pai telok ayongzük.

Iba sentong nung, District Nodal officer, NTCP, Dr.Reyosalu Lase Vizo-i campaign nükjidong aser COTPA 2003 nung ajemdaker jembia liasü.

Vizo-i ashiba agi, Smoke

Free campaign ajanga nüburtem dang moko/sali achiba lendong aser item temesepba chiyongtsü achi-ajemba ajanga temang nung timtem talisa cancer, stroke, TB, pneumonia aser tanga timtem balala adokdaksüba indang tekümdangtsü osang sangoktsütsü.

Moko machirtem aser moko ajanga adokba mokozü nung tanur aser tetsürtem kümzuka ayutsü asoshi iba campaign tenzüktsü, ta Vizo-i shisem.

Iba sentong nung Psychologist NTCP, Imkumla Aier meden liasü. Dy. Sp MTO aser District Anti-Tobacco squad, Team lennir William Kath-i tepela anküp o jembi, ta kasa sangdong ajanga metetdaksü.

## MENUNGRA BILEMTETER



Onoki teti meima aliba **asür Nungshilepden**, Na onok nungi pila-a anisungzük daki orr küm (5) süia oaka onoki na teti menungrar aser bilemteter.

*Temeim Kinungertem.*

## MULUNGNEN O

**Aser aji tamasa aliba ama auyiji ali-i meyiper, aser tanelajibo tagütsüsang Tsüngrem dangisa shilangtsü. (Sayutsüngir 12:7)**



**ASO:**  
20<sup>th</sup> Feb. 1946

**ASÜ:**  
4<sup>th</sup> Aug. 2021

Asür **Kitimenla Longchar** kinungertemi, la mapang talangka temang mejungi alidang nungi la asünü tashi shirnokisa aria bilema onok dang temeim sayuogo, ajak dang kanga pelar.

Kija, kibong, kiyonger, Arogo aser medemertem shirnokisa onok tammang tia nung shimaka alidang molungtsentsü ajak agi shi nung aser tanüla nung yariba den rongsen agi yariogo, nenok ajak dang kangasa pelaba metetdaksür.

Onok yarir shia dangi tsüngdong arua pelaba ashitsü tamakoktsü, saka asen teyanglur Tsüngrem dang nenok ajak molamoshia moajang ta onoki ajemalua sarasademtsür.

*Onoki Mejeta item dang pelar :*

1. Doctors and nurses of Eden Hospital, Dimapur
2. Doctors and nurses of CIHSR, Dimapur
3. Dimapur Aa Baptist Arogo.
4. Kashiram Council, Dimapur
5. Dimapur Sungratsü Senso Telongjem
6. Dr. Tiatula, Nagaland Multispeciality, Health & Research Centre Dimapur.

*Temeim Kinungbo, Chirnur, Semchirtem aser Kinungertem.*

OFFICE OF THE  
**KOHIMA JAPUKONGTSUR TELONGJEM**  
KOHIMA : NAGALAND

## KONANG TETUSHI AGÜTSÜR

Kohima Japukongtsür Telongjem ajanga külem tzükongtsürtem rongnungi pei wadang nung temaba jenjang (promotion) tongteta tzükongtsür nem konang tetushi tulu bener arutsü nung Kohima Japukongtsür ajaki pelar aser nenok nem tenüngsang agütsür.

1. Wt. Amenla Sashi Aonokpu. Secretary, Government of Nagaland. Lai Japukongtsür rongnungi mezüng Secretary jenjang tongtet.
2. Wt. Er. Limanaro Lakhuni. Engineer-in-Chief NPWD. Lai Nagatsür rongnungi mezüng Engineer-in-Chief jenjang tongtet.

Tsüngremi nenok taküm aser mapa tajung maneni takokba nun glen ania moajangma ta asen Tzükongtsür ajaki sarasademtsür.

**Sd/-**  
**CHUBASENLA**  
President, KJT

**Sd/-**  
**ALANGLAWALLING**  
Secretary, KJT

## DRDA-i Oxygen Concentrator tenla agütsü

**Wokha, Luroi/August 10, 2021 (TYO):** DRDA Wokha, agizüka liasü.

Item osettsüset mulungsoa tenüng nung, Project Director, Wokha, K.Shekiho Phuleshe-i, Wokha District Task Force for COVID-19 nem oxygen concentrator 10, pulse oximeter 8 aser N-95 face mask 100 shi tenla agütsü, koba ADC (HQ) T.Lankonsen Tsanglao-i imlar, ta pai lemsatop.



Hyderabad, Luroi/August 10, 2021: Mongolbarnü, Hyderabad City Police ajanga Olympics nung bronze medal ankur PV Sindhu nem tenüngsang agütsüba sentong ayonga agiba mapang, City Police Commissioner Anjani Kumar ket nungi Sindhu-i sempet agizükba noksa nung ankur.

## AFI-i kümshia August 07 nü "National Javelin Day" amungtsü

**New Delhi, Luroi/August 10, 2021 (Agencies):** Tokyo Olympics nung, August 07, 2020 nü India athletics tsütsü otsütsüsa Neeraj Chopra-i gold medal anguba bilemteta aser pai iba jenjang ajangzükta asoshi pa nem tetushi agüja, kümshia iba anogo (August 07) nung Athletics Federation of India (AFI) ajanga National Javelin Day benjongmung ayongzüksü.

Taoba hopta tembangba Olympics asayamung javelin tetoktepba nung, Neeraj-i gold medal ankur aser India nungeri iba tatalokba ya kodanga mamadoktsü.

Mongolbarnü, Athletics Federation of India (AFI) indang Planning Committee Chairman, Lalit Bhanot-i ashiba agi, AFI-i kümshia August 07 nü javelin tetoktepba asaya ayongzüksü.

"Athletics Federation of India indang planning

committee ajanga linük nung javelin saisapong ajangzüksü asoshi telemtetba agiogo aser iba anogo (August 07) Tokyo Olympics nung Neeraj Chopra-i gold medal takok anguba yong, iba anogo bilemteta, kümshia August 07 nü India tesem ajunga nung javelin tetoktepba ayongzüksü," ta AFI ajanga Neeraj Chopra nem tenüngsang agütsüba sentong ayongzükba mapang Bhanot-i ashi.

Olympic athletics nung India-i gold medal ka angutsü imlaa ataa arur, August 07, 2021 nü Tokyo Olympics men's javelin nung Neeraj Chopra-i takok anguba mapang pai iba mangdang atalokja liasü.

Iba asayamung (men's javelin) nung tanga tetokteperitem ajateta asayatsü asoshi, Neeraj-i metre 87.03 shi ayimjema yoktet. Tanaben merangdangba mapang, Neeraj-i asentenshir yok, kong

pai metre 87.58 shi yokteta pai temaba jenjang ajangzükta.

Tokyo Olympics nung Neeraj Chopra-i gold medal mangdang, shooter Abhinav Bindra-i kija tetoktepba nung India atema gold medal ngua lir. 2008 Beijing Games - tebur 10-metre air rifle tetoktepba nung Abhinav-i gold medal anku.

Neeraj temang nung timtem adoka aser Covid-19 tenokdangba ajanga pai küm ana shi tetoktepba nung shilem magiteti aru. Ibaji masüdag, 2018 Asian Games aser Commonwealth Games nung Neeraj-i gold medal nguogo.

Ajisüaka, pai Olympic nung shilem agitsü temlungtetba tulu nung renemshia liasü aser taoba küm qualifying asayamung nung pai metre 87.86 shi aser taküm March ita asayamung tanga ka nung pai metre 88.07 shi yokteta Tokyo nung asayatsü temsüa aküm.

## T20 World Cup: New Zealand squad nung Taylor aser Colin masayatsü

**New Delhi, Luroi/August 10, 2021 (Agencies):** United Arab Emirates (UAE) nung October 17, 2021 nungi tenzüka asayatsü aliba ICC T20 World Cup atema New Zealand indang züngsem 15 squad nung batsman tejen Ross Taylor aser all-rounder Colin de Grandhomme na maniok.

New Zealand team nungi fast bowler rongnung Trent Boult, Tim Southee, Lockie Ferguson aser Kyle Jamieson nung den all-rounder Daryl Mitchell aser Jimmy Neesham na dena lir. Squad nung medium pace all-rounder Colin de Grandhomme aser fast bowler Hamish Bennett na melen Daryl aser Jimmy na anioka liasü.

October 17 nungi November 14, 2021 tashi United Arab Emirates aser Oman nung ayonga asayatsü aliba T20 World Cup nung, spinner Todd Astle-i külem asayar leg-spinner Ish Sodhi aser left-arm spinner Mitchell Santner na den asayatsü. Iba asayamung spin bowler atema kanga tongtibang asütsü imlar.

Iba squad nung, fast bowler Adam Milne-i züngsem 16buba ama asayatsü. Kasa squad batting lineup nung, opener aser wicket-keeper Tim Seifert, Martin Guptill, Devon Conway aser captain Kyle Williamson nungeri batting tsütsü nungittsü. New Zealand-isa September ita tetenzüklen Bangladesh nung T20s pungo aser iba sülen ita tatemlen Pakistan nung T20 den one-day series atema squad sangdongogo.

Item tour nung, New Zealand team nungi asayar 32 agi shilem agitsü.

Maneni, September tatemlen aser October tetenzüklen asayatsü aliba Indian Premier League nung, pei pei franchise nung shilem agitsü asoshi, Williamson, Seifert, Boult, Jamieson, Neesham, Santner, Ferguson aser Milne nung den England nung alisang Finn Allen yoktsü sentong lir. Bangladesh aser Pakistan series nung Allen asayatsü.

Kasa mapang, sub-continent tour aser T20 World Cup atema

NZC-i squad balala sangdongogo.

\* ICC T20 World Cup aser India T20s squad: Kane Williamson (c), Todd Astle, Trent Boult, Mark Chapman, Devon Conway, Lockie Ferguson, Martin Guptill, Kyle Jamieson, Daryl Mitchell, Jimmy Neesham, Glenn Phillips, Mitchell Santner, Tim Seifert (wk), Ish Sodhi, Tim Southee, \*Adam Milne (injury cover)

\* Bangladesh T20Is aser Pakistan ODIs squad: Tom Latham (capt, wk), Finn Allen, Hamish Bennett, Tom Blundell (wk), Doug Bracewell, Colin de Grandhomme, Jacob Duffy, Matt Henry (ODI only), Scott Kuggeleijn, Cole McConchie, Henry Nicholls, Ajaz Patel, Rachin Ravindra, Ben Sears (T20 only), Blair Tickner, Will Young

\* Pakistan T20Is squad: Tom Latham (capt, wk), Finn Allen, Todd Astle, Hamish Bennett, Tom Blundell (wk), Mark Chapman, Colin de Grandhomme, Martin Guptill, Matt Henry, Daryl Mitchell, Ajaz Patel, Ish Sodhi, Ben Sears, Blair Tickner, Will Young.

## '2028 Los Angeles Olympics' nung cricket bendenloktsü asoshi jembitsü: ICC

**New Delhi, Luroi/August 10, 2021 (Agencies):** Los Angeles yimti nung asayatsü aliba '2028 Olympic Games' nung cricket saisapong bendenloktsü atema, Mongolbarnü International Cricket Council (ICC)-i parnok asalentong jangjatsüogo.

USA nung cricket sapur million 30 shi lir aser Olympic tetoktepba asayamung nung iba saisapong tanaben tenzüksütsü asoshi 'LA 2028 Olympic' ya tetemjen asütsü.

1900 Paris Olympics nung Cricket khen dang asayadanga lir, kong Great Britain aser asayamung ayonger telok - France na tsüngda asayaogo. 2028 Olympics nung iba saisapong bendenlokra, küm 128 nung iba saisapong mezüng asayaba alimai angutsü.

Iba saisapong (cricket) ya taruba küm 'Birmingham 2022 Commonwealth Games' nung asayatsü terenemba lir.

ICC Chairman, Greg Barclay-i ashiba agi, Olympic Games nung cricket bendenlokba ajanga, saisapong aser Games anaprongla ajangzüksü.

"Tang ama tensa (Covid-19) tamajungdang, Games takok ngua ayongzükta atema, ICC tenüng nung, ni IOC, Tokyo 2020 nem tenüngsang agütsü. Atangji nunga iba asayamung jangratema repringogo aser Games takok ngua achaayangtetba atema alima ajunga nung meimchir aika süngmangdaksüogo. Taruba Olympic Games nung, asayamung shilem ka ama cricket saisapong bendenlokba onoki repringner," ta sangdong ajang Barclay-i metetdaksü.

"Iba saisapong bendenloktsü asoshi onok longjemer inyaksangshitsü aser Olympics nung cricket bendenloktsü asoshi nukla tajung lir ta onoki imlaa atar. Alima tesem ajunga

## India nunger dang Afghanistan... (Tapak 7 nungi...)

"Afghanistan nung Embassy-isa, iba tetuyuba inyaksangshia aliba India nunger company tem danga India nunger mapa inyakeritem project inyaka aliba tesemtem nungi tayimtsü service manentsü tsüngda anintsü tetuyuba agütsüogo. Afghan mesera bendanger company tem nung inyaka aliba India nungertemi parnok employer dang India-i meyipa aotsü atema achaayangtsütsü mepeshitsüla," ta kasa sangdong ajang metetdaksü.

nung cricket sapur billion ka dak tema lir aser parnok rongnung shilem 90 agi Olympics nung cricket asaya repringtsü yongyar," ta Barclay-i shisem.

ICC Olympic Working Group nung, England aser Wales Cricket Board, Chairman, Ian Watmore-i

tekolak ka ama maparen achaayangtsü. Iba maparen asoshi, Ian den ICC Independent Director Indra Nooyi; Zimbabwe Cricket indang chairman, Tavengwa Mukuhlani; Asian Cricket Council indang ICC Associate Member Director aser Vice President, Mahinda Vallipuram aser USA Cricket indang chairman, Parag Marathe nung külemi inyaksü.

Olympics nung kanga dang yongya ataba cricket asaya tanaben tenzüksütsü asoshi mapang agi tongogo, ta Marathe-i bilemba ka lemsatop. Iba ama nungtugu asayamung ka nung, cricket saisapong bendenlokba ajanga USA nung iba saisapong kanga renloka aotsü, ta pai ashi.

"Olympics nung iba saisapong bendenloktsü atema cricket indang bid nung pusemstü maangka anguba asoshi USA Cricket yongyaseter. USA nung iba saisapong wadang ulushitsü aser renlokdaaksütsü asoshi asalentong yangluba mapang ka nung, Olympics nung iba saisapong bendenloktsü asoshi mapang agi sempettsüogo," ta pai shisem.

Hyderabad, Luroi/August 10, 2021: Mongolbarnü, Hyderabad City Police ajanga Olympics nung bronze medal ankur PV Sindhu nem tenüngsang agütsüba sentong ayonga agiba mapang, City Police Commissioner Anjani Kumar ket nungi Sindhu-i sempet agizükba noksa nung angur.

## BILEMDANGANG

"Ambangyimeri bendenba rongsenji rürlong den saku."